

Persediaan hadapi cabaran media digital

Kuala Lumpur: Selaras perkembangan teknologi kini, industri media di negara ini perlu bersiap-siaga melakukan perubahan bagi memastikan mereka kekal relevan dan mampu memenuhi cita rasa serta kehendak masyarakat secara menyeluruh.

Pensyarah Kanan Komunikasi Fakulti Bahasa Moden dan Komunikasi Universiti Putra Malaysia (UPM), Dr Syed Agil Alsagoff, berkata walaupun berita dan maklumat terkini boleh diperoleh menerusi media digital baru, keperluan terhadap

media konvensional seperti akhbar masih mendapat permintaan baik khususnya bagi mereka yang mahu mendapatkan kandungan berita secara lebih terperinci.

Beliau berkata, bagi mendepani cabaran itu, media perlu berani melakukan perubahan seperti dengan memperbanyakkan lagi kupasan berita mengenai isu dihadapi masyarakat dan mempergiatkan amalan serta budaya membaca seawal peringkat kanak-kanak.

“Lebih penting, setiap

kandungan berita yang disampaikan mestilah kreatif dan dapat menarik keseronokan serta cita rasa masyarakat merangkumi pelbagai lapisan peringkat umur.

“Walaupun mempunyai platform media digital termasuk blog dan aplikasi dalam talian yang boleh diakses menerusi gajet, saya percaya masih ramai pembaca yang suka membaca akhbar secara *hard copy*, malah, kupasan berita yang disampaikan adalah lebih mendalam serta terperinci,” katanya kepada BH Skor, baru-baru ini.



Dr Syed Agil Alsagoff

Segerakan pembaharuan
Dr Syed Agil berkata, beliau percaya pengaruh media konvensional di negara ini masih kuat dan mampu bertahan sekiranya pembaharuan dapat disegerakan serta ditingkatkan lagi seiring ledakan teknologi kini.

Katanya, peranan media juga penting untuk menggalakkan budaya membaca dalam kalangan masyarakat kerana hanya menerusi pembacaan dapat meningkatkan penguasaan pengetahuan seseorang itu terhadap pelbagai aspek.

“Tidak dinafikan kita

tidak boleh menolak teknologi, tetapi bagaimana kita dapat manfaatkaninya untuk tempoh jangka panjang dan membuat penilaian berita berkualiti daripada sumber yang dipercayai.

“Kita kena contohi negara maju yang lain, meskipun media digitalnya lebih jauh ke hadapan, mereka masih mengekalkan media konvensional kerana generasi muda mungkin gemar terhadap teknologi gajet ini, namun golongan berusia masih bergantung kepada akhbar untuk mendapatkan informasi terkini,” katanya.